



أنا اتولدت مكانش في لجان شعبية بس أنا سمعت عنها أيام مثلا في السويس ساعة العدوان الثلاثي كان بيبقى في لجان شعبية.

اللجنة الشعبية مكانش بنحس بيها قبل الثورة، لكن أحتجنا لها وقت الثورة، وقت الناس اللي هي هربت من السجن، ساعة الإنفلات الأمني. كان ليها دور مهم جدا في الثورة، كان ليها يعني واقع ملموس.

اللجنة الشعبية دي ظهرت بالظبط من أول يوم ٢٩ يناير لما قالوا أن المساجين هربت، فهيبتدوا بقی إيه... يهجموا على المناطق وهيهموا على البيوت وكده، فالتاس نزلت ساعتها وعملوا اللي هي اللجان الشعبية. اللجنة الشعبية دي عبارة عن الناس بتاعت الشوارع العادية بتنزل كلها مع بعض وبيقفوا علشان يساعدوا أنفسهم من أي خطر هيجي عليهم ويحموا بقی شارعهم ويحموا بيوتهم ومنطقتهم وكده يعني.

اللجنة الشعبية هدفها يعني إن هما كانوا بيفتشوا الناس اللي هي بتعدي من منطقتهم علشان محدش غريب يدخل عليهم.

تخش بقی على أي أمة شارعكوا تلاقي في جماعة موجودين في كل شارع قاعدين اتنين- ثلاثة.. «آه ده نعرفوه» يعدي. «آه الراجل ده تبعكوا؟!»

أنا واحد من الناس مكنتش أعرف ناس كتير أوي في المنطقة عندي. اللجان الشعبية كانت حلوة، كانت فيها روح إن احنا عرفنا كلنا بعضينا. نقف في اللجان الشعبية مع أهل المنطقة وكده، كنا بنخاف على بعض أوي.

كل واحد نازل بشومة بقی، اللي نازل بعصاية مكنسة، واللي صاحب ساطور كنت بحب أقعد معاهم بقی. الحاجة تبعتلنا كشري ودول ينزلونا دور شاي وحاجة ساقعة. كان الموضوع جميل. تحسه بقی

كان كل الناس اللجنة الشعبية عملتلنا حاجات حلوة كثير، حموا بعض. في الوقت ده تحسي إن في بني آدمين خايقة عليك.

عمري ما تخيلت إن ده ممكن يحصل. أولا إن الناس تبقى خايقة للدرجة دي إنها هتنزل ناس تقف، وعمري ما تخيلت الناس اكتوالي تتجمع على حاجة وتعملها!

الحمد لله إن هو حصللي في حياتي شوفت حاجة زي دية. كل الناس تنزل بقى تقوم بمهمة الداخلية إتجاه نفسها بقى. يعني كان موضوع جميل، وكانت أجمل حاجة فيه إن هو الواحد حاسس أن الحاجة دي مش بتحصل إلا مرة واحدة في العمر فعلا.

كانت في ناس عندنا، يعني جنبنا، كانت بتبقى واقف الشارع، أي حاجة عربية أو أي حاجة معدية يفتشوها، يشوفوها إذا كان ده حد معه حاجة... هيقتل حد ولا لأ.

مش لازم يكون ناس هتهجم بقى والشغل ده، لأ لأ أي حاجة ممكن تحصل في المنطقة هما ممكن يقوموا يعملوا لجنة شعبية مع أنفسهم.

أفكر موقف عندنا حصل، موتوسكل عدى بآلي وكده وهو بيضرب بس صوت. موقف بقى مضحك شوية. سمعنا صويت ورا، في الشارع اللي ورانا، واحدة بتصوت: «يالاھوي! يالاھوي!» كله جري بقى وعملنا بقى إيه... قوات خاصة: «إنت تعالى هنا وأنت تعالى هنا وده بقى يبص لفوق... إطلعوا يللا». وطلعنا وبتاع وخبطنا على الشقة: «إنتوا فيكوا حاجة؟» راح الراجل بيقولنا: «ملكش دعوة بينا» - «في إيه يا حاج طيب؟» - «ملكش دعوة بينا». روحنا لقينا الولية طلعت: «إلحقوني ده جوزي بيضربني!» كانت أحلى حاجة في الدنيا اللجان الشعبية دي، والله العظيم الداخلية نفسها ما بتعرف تعمل اللي اللجنة الشعبية دي بتعمله.

كان واحد خد الكشك بتاع الشرطة اللي كان بيقتد فيه، الكشك اللي هو بلاستك ده، خده بقى وهو أفكر نفسه ظابط، قاعد جوه الكشك بقى قاعد ومأنتخ أوي وماسك السيجارة في إيديه وفكر نفسه ظابط بقى.

اللجان الشعبية ديت أحسن حاجة حصلت في الثورة. هي والتوقيت الصيفي اللي رجعه تاني بعد ما اتلغى.

أد إيه يعني رومانسية وإدارة ذاتية بقى و«أيوه!» ومش عارف إيه، وبعدين تتحول اللجنة الشعبية لرعب يعني.

أنا شوفت لجان شعبية محترمين جدا، زي احنا مثلا كلجنة شعبية في ميدان التحرير بنقف علشان خاطر إنتي داخله أفتشك. ممكن تكوني شايلة موس أو حاجة يأذي اللي جوه. أنا معاهم، لكن أي لجنة شعبية تاني شوفتها في حياتي أنا مش معاهم، مش مع إن أنا انزل لجنة شعبية أمسك سلاح. في حاجة اسمها حكومة دي بتحمينا، ده المفروض برضه. إن أنا أسلمك ليها وهي تتعامل معاك... تضربك بقى، تموتك... إنت بتحميني. لكن إنت كمصري زيي زيك مينفعش تضربني.

في ناس محترمة طبعا كانوا ماسكين مثلا سنج، شوم، بس مبيتعاملوش بيه، مبيضربوش بيه. بس كان في ناس بتضرب بالسيف. أنا شوفت ناس عندنا كانوا ماسكين بيتعاملوا بسلاح. يعني أنا مثلا واحدة نازلة، ممكن يقولوا عليا بلطجية ويضربوني، يموتوني وأنا مش بلطجي... أنا نازل عادي ماشي.

أنا كنت ماشية قبل كده في الدقي، كنا راكبين ميكروباص. خرج علينا ناس كانوا ماسكين سلاح وبتاع فكان الميكروباص كله سترات وكده، كانوا عايزين ينزلونا من الميكروباص ويقولوا: «لجنة شعبية». فأنا رديت عليهم وقولتلهم: «إنتوا لو لجنة شعبية فعلا مش هتنزلوا. إنتوا هتحمونا و هتخلونا نروح». فقالك: «لأ ده عشان احنا لجنة لازم نفتشكوا قبل ما تطلعوا». كانوا بيتعاملوا طبعاً بيشدوا الستات ويفتشوها والكلام ده. ومش بيفتشها علشان يحميها، بيفتشها علشان ياخد منها اللي معاها.

كان اللي مات في لجنة شعبية، كان في فيصل، كان اسمه إسلام. إسلام ده كان واقف في لجنة شعبية وبيقوف موتوسيكل فالموتوسيكل راح مطلع الآلي... ترررررر.. ووقع كام واحد اتصابوا وإسلام مات. ده كان من ضمن شهداء اللجان الشعبية.

أنا شايف إن اللجان الشعبية في الفترة دي، لو ليها دور في الأرض هتحصل مشكلة كبيرة جدا. خلاص يعني الشرطة أو الجيش هما بس اللي لهم دور حماية البلد، فأنا مش محتاج إن واحد زيه زيي بيتندي يتحكم فيا، حتي لو هيقفني يقول: «إنت رايح فين؟». لأ أنا خلاص في وقت حرية، خلاص رجع الأمن بقوته تم تسليحه وخلاص من حقي إن أنا كمواطن إن اللي يوقفني أو يقولي بكل شرف وكل إحترام الأمن، لكن حد في الشارع زيي زيه معتقدش إن الفترة دي محتاجاها يعني.